

Uztailaren 14an
URTEAN ZEHARREKO 15. IGANDEA

Agurra

Gure Berri Ona den Jauna izan bedi zuekin.

Sarrerako oharpena

Jaunaren izenean bilduak gaude, senideok. Munduko Eliza ikusgarri gertatzen da elkarte honetan, asko nahiz gutxi Jaunaren aginduari erantzunez Eukaristia ospatzeko biltzen garenean.

Damu-otoitza

Jesus Jaunak hitzaren eta Eukaristiaren mahaira dei egiten digu eta, horretarako, bihotz-berri gaitzela eskatzen. Aitor ditzagun, beraz, geure bekatuak eta eska dezagun uste osoz Jainkoaren errukia.

—Jesus Jauna, Aitagana garamatzan bidea: erruki, Jauna.

—Jesus Jauna, herri guztiak argitzen dituen egia: Kristo, erruki.

—Jesus Jauna, mundua eraberritzen duen bizia: Erruki, Jauna.

Erruki dakigula Jainko guztiz ahaltsua, eta, gure bekatuak barkaturik, eraman gaitzala betiko bizitzara

Otoitza

**Zure egiak, Jauna, argitu egiten ditu oker dabiltzanak,
 bide zuzenera itzul daitezen;
 egizu, izenez kristau direnek
 egintzetan bete dezatela eta agertu
 beren kristau izatea.**

Zure Seme Jesu Kristo gure Jaunaren bitartez,

Zurekin eta Espiritu Santuarekin batean Jainko eta Errege bizi baita gizaldi eta gizaldietan.

Hitzaren liturgiari oharpena

Maitasuna eta biziaren aldeko apustua eta behartsuenengandik hurbil egotea dira kristauon agindu nagusiak. Hauek ez gaituzte munduko beste arauetatik libratzen, baina bai zuzengabekeria eta utzikerien aurrean aske egiten, Ebanjelioarekin leialak izateko.

Lehenengo irakurgaia (Dt 30, 10-14)

Deuteronomio liburutik

Moisesek honela hitz egin zion herriari: «Entzun Jaunaren, zure Jaungoikoaren, hitza eta bete Haren esanak eta agindu guztiak, Legean idatzirik dauden bezala; itzul zaitez Jaunarengana, zure Jaungoikoarengana, bihotz-bihotzez eta gogo-gogoz.

Izan ere, gaur zuri ematen dizudan agindua ez duzu zailegia, ez dago zuregandik urruti. Ez dago zeruan; ez esan zure baitan: Nor igoko zaigu zerura? Nork hartuko eta guri entzunaraziko, bete dezagun? Ez dago itsasoaz beste aldean; ez esan zure baitan: Nor joango zaigu itsasoaz beste aldera? Nork hartuko eta guri entzunaraziko, bete dezagun? Ondo-ondoan duzu hitza: zure ahoan eta zure bihotzean; bete ezazu».

Erantzun-salmoa (Sal 68, 14 eta 17. 30-31. 36ab eta 37)

Jau-na-ri kan - ta, o-na bai - ta, hain du haun-di -
a be - re be - ti - ko e-rru - ki - a.



Nire otoitza, aldiz, Zugana, Jauna, ‘
 zure grazi egunean, ene Jainko,
 hain onbera baitzara, entzun nazazu, ‘
 zure laguntza leiala emadazu.
 Entzuidazu, Jauna, samurra baita zure grazia,
 zeure erruki handiz niri begira. R/.

Ni, berriz, gizagaixo dohakabe nauzu,
 zeure laguntzaz, Jainko, onik atera nazazu.
 Jainkoaren izena kantuz dut goratuko,
 eta esker on emanaz ospatuko. R/.

Jainkoak salbatuko baitu Sion,
 eraikiko ditu berriz Judako hiriak.
 Haren morroien jatorriak hartuko du ondareztat,
 Haren izena maite dutenak biziko dira bertan. R/.

Bigarren irakurgaia (Kol 1, 15-20)

San Paulo Apostoluak Kolosarrei

Jesu Kristo, Jainko ikusezinaren irudi da, sorkari guztietan lehen semea. Beronen bidez baitira eginak gauza guztiak, zeru-lurretakoak, ageri direnak eta ez direnak: Aulki, Jaun, Nagusi eta Agintedunak; gauza guztiak Beraren bidez eta Berarentzat dira eginak. Diren guztiak baino lehenago da Bera, eta guztiak Berarengan diraute. Gorputzaren buru ere Bera da, Elizaren buru, alegia. Bera da hasiera, hilen arteko lehen semea, diren guztietan Bera izan dadin lehenengoa. Jainkoaren gogoko izan baita betearen betea Harengan egotea, eta Haren bidez, gauza guztiak Berekin

adiskidetzeari; Haren gurutzeko odolaz bakeak eginik, zeru-lurretan diren guztiak.

Aleluia (Ik. *Jn* 6, 63b- 68b)



Zure hitzak, Jauna, espiritu eta bizi dira;
Zuk daukazazu betiko biziaren hitzak. R/.

Ebanjelioa (*Lk* 10, 25-37)

Homiliarako argibideak

Egizu beste horrenbeste

Errefuxiatuen krisiak zapora txarra uzten die askori. Agerian geratzen da europarrok jada praktikatzen ez ditugun balio batzuek harrotzen garela. Errua ezin zaie gobernuei bota. Agintariak nahiago badute sarritan dirua errefuxiatuak urrun mantentzeko eman, euren herrialdeetan hartu baino, europarrek bertan nahi ez dituztelako da. Izan ere, balioei baino gehiago botoei begiratzen diete agintariak. Litekeena da Elizak eta kristauak berdin erreakzionatu izana. Errefuxiatu batzuk berarekin ekartzeko Aita Santuaren keinuak ez du asko balio izan, Gaur, inoiz baino gehiago behar dugu Eliza samariarra, gure munduko biktimengana hurbiltzen dakiena. Ekiteko garaia da, zaurituta daudenengana hurbiltzeko eta horien gertuko bihurtzeko unea. Agindu hori erraza

da betetzen. Nahikoa da **abian jarri nahi izatea** (*Dt 30, 10-14*). Ez zaigu eskatzen munduaren azken muturrera joatea, inguruan dugun errealitatez jabetzea baizik, besterik ez.

Historian zehar, espezialista izan da Eliza beharrak ikusten eta erakunde modura erantzun egokiak ematen. Gaur egungo beharrak hain direnez handiak, fededunen ekintza gaitasuna gainditzen dute. Horregatik, prest egon behar dugu borondate oneko gizakiekin kolaboratzeko, errukia sentitzen dutenekin eta zaurituta eta odoletan dauden pertsonen kargu egiteko eskuak zikintzeko prest daudenekin. Beharrezkoa da boluntariora bultzatzen jarraitzea, hori baita gaur egun Ebanjelioaren erdian dauden **errukizko lanak** egiteko modu zehatza.

Ebanjelioak aipatzen duen lege-maisua zer egin nahi zuen jakin nahi zuen, eta Jesusen eskutik aurkituko du **erantzun zehatza** (*Lk 10, 25-37*). Azkenean, fede juduaren molde estuetatik irteteko eta sufritzen eta pairatzen ari den gizaki ororengana hurbiltzeko gonbita espermentatuko du. Asmatutako istorio baten bitartez, Jesusek hankaz gora jarriko ditu aurreko planteamendu guztiak. Legean oso argi zegoen nor zen hurkoa. Israelgo herriarena zena, alegia. Baliteke batzuk kanpokoengana apur bat zabaldu izana.

Bikaina da Jesusek hurbiltasuna **datu objektibo** gisa ez zehaztea, hortxe, baten aurrean dagoelako. Hurkoa izatea nire esku dago, ez bestearen esku. Bestearengana hurbiltzeko gai banaiz, orduan bada hurkorik. Nire buruan eta nire interesetara itxita banago, ez dago hurkorik. Hori da gaur egun European gerta dakigukeena. Lehen, nahiko urrun zeuden afrikarrak, eta hispanoamerikarrak zer esanik ez, eta ez gintuzten hurko modura kezkatzen. Gaur egun gure artean bizi dira, baina oso zaila da hurko modura ikustea, ez baitugu beraiengana hurbildu nahi.

Erlijio juduaren ordezkariak, apaizak eta lebitarrak, beharrean ikusten dute gizakia, bere herriaren beharrean, baina itzulinguru bat eman eta aurrera jarraitu zuen. Ez dira hurko egiteko gai, hurbildu eta zaurituaren ondoan geratzeko gai. Kontrako aldean, samariarraren, **arrotzaren**, jokabidea deskribatzen du Jesusek, gizakiaren errealitateko hurbiltasun eredu modura. Bestearen kaltearen aurrean errukia sentitzeko gaitasunetik dator pertsonenganako hurbilketa. Bihotzak bultzatzen du pertsonengana hurbiltzera eta haien alde gure esku dagoen guztia egitera. Samariarraren erruki sentimenduak ez dira sentimendu huts izango, zaurituaren aldeko hainbat neurri praktiko hartzera eramaten dute.

Jainko ikusezinaren irudi izanda, Jesus bezalako pertsona bat bakarrik da gai bekatuagatik zaurituta dagoen gizakiarengana hurbiltzeko (*Kol* 1,15-20). Jesus da samariar ona, **Jainkoa hurbileko egin diguna**. Haren arrastoei jarraituz, Eliza samariarra izan nahi du gaur egungo Elizak ere, bandidoen eskuetan erortzen diren gizakientzat. Eukaristia honek errukiaren ministro egin gaitzala, gure munduko zauriak sendatzeko gai.

Jainkoaren herriaren otoitza

Senideok: iritsi daitezela gure otoitzak Jaunarengana, gure bihotzak ezagutzen dituenarengana.

—Eska dezagun Jainkoaren Semearen jakinduria Jainkoaren Hitza leialtasunez aldarrikatzen dutenentzat eta Eliza zerbitzatzen duten guztientzat. Eska diezaiogun Jaunari.

—Eska diezaiogun egiaren jabe bakarra den Jaunari, katolikoak ez diren beste kristau guztien alde, itun zaharraren herri diren juduen alde eta egiazko Jainkoa ezagutzen duten guztien alde. Eska diezaiogun Jaunari.

—Eska diezaiogun Jesus Salbatzaileari etxetik urruti bizi diren guztien alde, kartzelatuen, ahulen eta zapalduen alde eta pertsegituak direnen guztien alde. Eska diezaiogun Jaunari.

—Eska diezaiogun fedez zeruko Jaunari, hemen, bere etxean bilduak gauden guztion bakearen eta zorionaren alde. Eska diezaiogun Jaunari.

Jainko ahalguztidun errukitsua, maitasunaren aginduan bildu dituzu legeko betebeharrak guztiak; entzun gure otoitzak eta emaguzu bihotz eskuzabala, senideen sufrimenduen aurrean Zure Semearen irudira, samariar on bezala joka dezagun. Errege bizi baita gizaldi eta gizaldietan.

Jaunartze-ondorengo otoitza

**Zure dohainak harturik, otoitz egiten dizugu, Jauna:
misterio hau ospatzen dugun bakoitzean
gehitu dadila gure salbamena.
Jesu Kristo gure Jaunaren bitartez.**